

摘藻堂四庫全書薈要

集部

欽定四庫全書薈要卷一萬四千五百九十四

集部

元豐類藁卷三十六

宋 曾鞏 撰

啓狀

應舉啓

右鞏啓伏念鞏材質淺陋藝學荒蕪讀聖人之經未知  
大義明當世之務多泥舊聞雖堅樹立之心豈適通變  
之用矧罹禍釁屢抱憂哀是以三遇文闈一踰歲紀足

跡不游於場屋姓名不署於鄉閭僕僕東南有衣食婚嫁之累拘拘蚤夜惟米鹽薪水之憂今者側聽詔書講求士類顧私恩之可念迫生理之難周義不自皇勢當強起蓋以出而載質無他業之可為仕以為貧亦古人之所處遇高明之見照殆否結之將通伏以某官梁棟瓊材琮璜茂器發文章之素蘊當仁聖之盛期忠言嘉謀施之有效流風善治所至可傳嘉獎士倫助成世教況親承於著令方序別於羣材貌是羈孤最為滯拙仰

遵舊禮敢忘桑梓之恭輒進曼辭庶當鷄鶩之贄察其  
素學采以寸長盡繫及物之仁惟俟至公之賜

謝杜相公啓

伏念羣志雖策礪性寔滯頑行不足比古之人材不足  
適時之用居常齟齬動輒困窮往以孤生而蒙收接又  
遭大故而被救存非常之恩德所加空知感激無用之  
技能素定曷有報償至於數千里之間三四年之後去  
冬之首方能屬思以為書積日之勤庶或因辭而見意

不謂使者至門之日正值相君失子之初遠瀆高明已  
難期於省覽況逢哀惻豈能必於薦聞因此復憂懇悃  
之誠無由自達視聽之側雖推心之遠大寧責禮於賤  
微然義未足以論酬而言又不得以叙謝其為私計豈  
敢自皇伏惟相公當世表儀本朝柱石許還私第聖意  
雖優於大臣召用安車人心素望於元老伏祈上為邦  
國善保寢興

回傳侍講啓

翠啓伏審祇膺詔檢入奉經筵伏惟慶樹伏以某官秉  
德粹冲受材闕廓邁盛辰而開迹席撫仕以陞華善政  
流風已推行於民上高文大策久聳動於朝端果允僉  
言特膺迅用從容帝幙方演暢於微言密勿禁林佇裁  
成於明命自聆拜寵方念騰書辱見獎於舊遊遽先流  
於華問欣愉感幸交集悃誠

代人謝余侍郎啓

右某啓伏念某歸而閒處時所背馳分功名之無期嗟

志意之空大言當世之事懼尚口而更窮求後人之知  
因著書而自見踈闊已甚抵棄未能輒布聽聞方虞訶  
譴屬小兒之過拜辱餘論之見存指瑾掩疵大為之地  
憫窮悼屈勤出於衷省枯槁之姿力垂報德激哀殘之  
氣感欲忘身瞻風采之夙遙役魂神而飛去尚當益壯  
以塞誤知

與劉沆龍圖啓

右翬啓伏念翬方抱憂哀且多疾病貧不得已則俗事

皆當自謀旅無所容則世人誰肯見恤今者伏遇知府  
龍圖給事愷悌成德勸勉為懷忘後進之至微假溫顏  
而與接知其孤立念其數竒謂其有詩書之勤則曲加  
於獎待謂其有衣食之累則特甚於矜憐且使受田之  
獲安實由為地之至大在甘旨有毫髮之助於子弟乃  
丘山之思況此餘庥可均散族雖遠台坐常注愚心復  
得交游之傳愈知意愛之厚自非土石豈不激昂粗知  
古今可勝感勵恨當迷塞曷用報償而方先人之葬送



未成偏親之奉養多乏四弟懷仰哺之託九妹有待年  
之期凡靡敝於秋毫皆經營於方寸顧惟私計當議遠  
遊世俗險艱豈諳嘗之不熟性靈踈拙實齟齬之可憂  
未卜趨承更增慕戀

謝解啓

伏覩解文首蒙舉選伏念鞏才非卓越識匪該通素志  
慕乎古人故時情之所背虛名聞於當世故衆忌之所  
排患難艱危流離頓挫孰有至孤之迹敢萌希進之心

顧生理之難周迫私衷之可念學而干祿誠匪素懷仕  
以為貧竊將自比是以聞詔之出負笈以來豈意片文  
首塵高選以至天倫之薄陋子黨之空踈皆自單平得  
蒙收齒追維會合亦有端原此蓋伏遇某官崇獎士倫  
助成世教以虹蜺之光而被飾以律呂之氣而吹噓致  
此屯窮階於振發敢不勉增素學益勵前修庶全必勝  
之名以答至公之賜謹奉啓陳謝

回李清臣范百祿謝中賢良啓

右鞏啓竊以設科以求特起之材發策以訪可行之論  
是維高選果得異能伏以賢良某官志敏以強詞嚴而  
贍迹前世之事而博極羣書議當今之宜而常引大體  
及親承於聖問遂絕出於時髦方喜聞風遽蒙枉記仰  
惟謙抑之過第積感銘之深

回人謝館職啓

伏審試藝禁林陞華儒館伏惟慶慙伏以都官學士英  
材傑出玉璞渾成邁時運之光華奮文章之溫雅第榮

科於秘殿蚤邁等倫陞膺仕於本朝存騰譽望較雕龍  
之麗藻列架翬之秘局果被明綸式符輿頌方展騰書  
之好遽蒙削牘之私仰服謙撝退深感戰

與北京韓侍中啓

右翬啓伏念翬顧以諸生守茲劇郡撫敝封之云始望  
仁境以非遙恨無羽翼之飛馳與操几杖欲以緘滕之  
託寓聊布腹心然而治獄訟之浩煩振紀綱之弛壞覺  
形勞之少暇信材短以難周致是懇誠稽於進達屬高

秋之在序惟坐鎮之多餘必有禎祥來寧動履伏以留  
守司徒太師侍中著龜四海柱石三朝有太平之功周  
公之所以勤王室有純一之德伊尹之所以格皇天固  
已書在宗彛藏之盟府而乃以退為進處上用謙自避  
遠於煩機久淹回於外服宜從巖石之望趣正衮衣之  
歸敢冀上為宗祊善綏寢饋

二

翬啓伏念翬習吏非長得州竅劇耗神明於簿領疲精

思於追胥尚恃餘庠幸無曠事然而塞茅心而已甚飾  
竿牘以未遑故魂爽雖驚於門闕而候問不通於幕府  
仰繫明恕終賜矜容今者北土早霜晏陰始肅伏惟順  
天時之常序養浩氣之至和神民所依福祿來萃恭以  
司徒太師侍中股肱三世龜鑑四方勤勞著於邦家功  
德施於社稷方且歛嘉謀於一面爵羣望者五年郭令  
之繫安危素形公論周公之為左右宜冠本朝華夏蠻  
貊之傾心昆蟲草木之望賜豈伊蕞質獨注微誠伏惟

上為宗祊善調寢餼

回許安世謝館職啓

右鞏啟伏審顯承詔檢進踐書林伏惟慶慰國家聚四部  
之書藏之秘近擇一時之俊任以校讐映朝序以甚清  
簡上心而滋厚恭以檢正學士學深而富識大以明擢  
平津於廷中蔚為首選賴王祥於海上休有治功天衢  
寢亨時望攸屬遂膺給札之召來賁登瀛之遊侍從邇  
班廟堂大任自茲而往計日可期承遠貺於珍函第仰

懷於謙德

賀韓相公啓

右翬啓伏審入膺典冊首秉鈞衡凡在生靈孰不慶幸  
伏以史館相公言為著蔡行應準緇仔肩一德之純弼  
亮三朝之盛君牙之纘舊服世濟忠勞吉甫之憲萬邦  
身兼文武果還柄用復冠中台茂惟拔岷之材素蘊非  
常之畧方且誼形王室盡邴魏之謀謨澤潤生民本蕭  
曹之清靜遂長生於百姓付衆職於羣能躋世太和與



人休息使雨暘寒燠罔不從時草木虫魚皆當蒙惠聲  
教可加於異俗功名必紀於無窮鞏一去朝行六更歲  
序顧茲舊物自慚簪屨之微保是孤生方賴陶鈞之賜  
其為忻抃實倍等倫

襄州與交代孫頌啓

右鞏伏念講聞譽望積有歲時歷下分符已出吏師之  
後漢南守土又居仁政之前惟事契之稠重實愚冥之  
幸會比於道路始接光儀蒙特異於眷存仍曲加於燕

勞論情至厚曾何謝於古人處義甚高固可敦於薄俗  
違離未久感戀交深諒惟得日之良甫及下車之始頒  
條多預納福甚隆伏惟知府少卿積學內克懷材間出  
久更當世之用自結明主之知高冠兩梁入綴班於九  
列輕車駟馬出按部於百城方圖間燕之宜自請蕃宣  
之便佇膺詔召不待歲成更惟上為廟朝善綏寢餼禱  
頌之至序述寧殫

洪州到任謝兩府啓

伏念鞏天與朴愚衆知凡近材不堪於施設動輒乖宜  
學多失於變通理難應用久與遊於儒館仍有列於朝  
紳適當千載之期曾之一毫之補既不能明國家遠大  
之體為上建言又未知究鄉閭委曲之情與民興利七  
移歲序四易外官坐尸祿廩之優寂無稱効幸屬章程  
之備得以持循茲蒙補郡之恩俾遂便親之請望故鄉  
而接壤與仲弟以連城及是忝踰出於假借此蓋伏遇  
某官心存博愛量極兼容簪履之微未忘於舊物陶鈞

之大不間於孤生曲致公言俾諧私計惟盡承流之分  
庶裨造物之仁過此以還未知所措

賀東府啓

右翠啓伏覩十月二十三日麻制伏審史館相公登庸  
天下幸甚伏惟史館相公言為著蔡行應準繩兼文武  
之閎材富天人之奧學神祇幽贊遭聖賢相得之時夷  
夏聳觀備君臣咸有之德果繇樞軸首秉鈞衡竊惟不  
世之姿深達當今之務必且開公平之路以序進羣能

銷壅蔽之萌以廣延衆論以寬大為拯救瘡痍之要以  
安靜為休息疲瘵之端絀聚斂之無名偃甲兵而不用  
果推此道以澤吾民食味別聲之倫舉皆受賜殊隣絕  
黨之俗孰不嚮風福祿可等於丘山功名必永於金石  
鞏蚤游墻屏幸遇陶鎔齟齬餘生始免擠排之患零丁  
滯跡漸期亨泰之來想望門闌以欣以躍

賀蹇周輔授館職啓

右鞏啓竊審奉被詔函進登史觀伏惟慶慰竊以安撫

運使學士材資秀特識度淹冲富華國之懿文抱據經  
之宿學一人嗟異欲相如之同時多士推先服桓榮之  
稽古果繇時望特被朝恩流馬木牛方佐中都之費金  
匱石室遂窺廣內之書竊惟寵數之行茲實要塗之漸  
佇躋法從用協僉言鞏獲在下風側聞成命分符海徼  
幸依德庇之餘寓直書林更託雋遊之末其為欣慶曷  
可縷陳

回泉州陳都官啓

右鞏啓竊審祇奉茂恩進陞寵秩伏惟慶慰竊以知府  
都官周材經務令德鎮浮席撫仕以彌優簡清衷而有  
素循良之政已洽於民謠恬退之風足用於世教果膺  
異數進陟名曹側聆成命之行方竊同聲之喜豈期厚  
眷特枉長牋載規謙抑之辭但切感銘之懇

明州到任謝兩府啓

右鞏啓伏奉勅命授前件差遣已於正月二十五日到  
任上訖伏念鞏材無遠用學殆小知誤蒙假器之恩愧

之當官之効屬時泰豫遇上休明欲治之心夔追於三代非常之旦特起於千齡顧是孤生最為遠迹雖逢辰之難得獨揣己之無堪故羣材銜鬻之初未始自陳於薄技而衆論騁馳之際何嘗參預於半辭錙銖動謹於成規毫髮敢萌於私見以茲循分庶獲寡尤然而一去本朝六祗外服十年荏苒未諧拱極之誠萬里周流尚負循陔之念當至仁之平施亦微物之可哀茲者方抵詔以在塗復析符而假守惟四明之窮裔處百奧之東



偏浮海之航鼎來於遠國踐山之築益起於堅城猥出  
選掄冒膺寄屬此蓋伏遇某官輔成世教樂育士倫陰  
推覆護之私每借吹噓之力致茲頑鈍與在甄收然而  
察無他惡之腸方賴兼容之度草茆之質使遂於向陽  
菽水之歡許伸於反哺盡待曲成之賜俯厭難止之情  
誓在糜捐用酬鈞播

賀趙大資致政啓

右鞏啓竊審進秩宮朝歸榮里閤伏惟慶慰恭以致政

宮保大資言為著蔡行應準繩肩一德以在躬歷三朝  
而遇主謹言大論著在朝堂善政流風被于藩服引年  
求謝抗疏彌堅屢降德音方倚老成之重難回壯節閔  
有官職之勞躡陞儲案之華退遂家居之樂門開袒帳  
衆嘆大夫之賢庭列賜車自知稽古之力惟能諧於素  
志實何愧於昔人鞏蚤荷陶鈞與游門館觀大賢出處  
之迹足勸士倫知儒者進退之宜敢忘師慕其為忻躍  
倍萬等儔

亳州到任謝兩府啓

右鞏啓蒙恩授上件差遣已於今月十六日到任上訖  
伏念鞏少雖好學長乏異能燭理甚踈蓋聰明之難強  
受材素薄顧齒髮之已衰誤竊寵靈叨塵器使茲者緣  
避親之著令蒙易地之推恩距畿甸以非遥就庭闈而  
甚便夫何最質廼爾冒居此蓋伏遇某官以廣愛之心  
而輔成世教以并容之度而獎育士倫致是顛愚及於  
推齒慰倚門之望以出於埏鎔謝推轂之言敢忘於策

勵庶收薄效仰答誤知過此以還未知所指

到亳州與南京張宣徽啓

右鞏啓蒙易近藩獲隣樂境雖未得就諸生之列請益於詩書然足以聞長者之風仰高於道誼始敢通牋記參候之禮庶幾將心誠饑渴之勤載省孤蒙實為幸會今者杪秋伊始嚴氣將升仰惟吐納之宜無爽燕間之喜伏惟某官言為著蔡行應準繩茂勤烈於三朝聳儀刑於四海仲山之明且哲宜保令名魯公之壽而臧永

膺全福更冀上為邦國善保寢興禱頌之誠叙陳罔既

元豐類藁卷三十六

謹案卷三十四第十一頁前五行又復以累已於  
國史刊本以訛於據彭本改

卷三十五第三頁前六行紫種自陳紫按蔡君謨  
荔枝譜云游家紫種自陳紫此當脫游家二字  
第三頁後六行右十四種按以上數目祇十二種  
與蔡荔枝譜同此疑誤

第四頁後七行荔枝三十四種按前後共三十二  
種此四字疑訛

卷三十六第八頁後六行已出吏師之後按彭本

師作部



總校官進士臣胡榮

校對官庶吉士臣翟槐

謄錄貢生臣王嘉稷



欽定四庫全書薈要

集部

元豐類藁卷

三十七至  
四十



詳校官助教<sub>臣</sub>常循

欽定四庫全書薈要卷一萬四千五百九十五

其部

元豐類藁卷三十七

宋 曾鞏 撰

啓狀

回陸佃謝館職啓

右鞏啓伏審祇膺詔檢入踐書林伏惟慶慰伏以侍講  
學士敏識兼人英辭華國翰林子墨之賦蚤擅貴名玉  
杯繁露之篇多明大義豈獨坐收於士望固能自結於



主知特啓書筵密鄰禁戶凡將急就之字已賴發明廣  
內石室之藏更資是正茲惟異選奚測遠塗方喜托於  
餘光遽先承於華問煜如黼藻實駭於彌文沛若江河  
更欽於善下其為感幸曷罄敷陳

與定州韓相公啓

右翠啓伏念翠轉走江湖推移歲月望門墻而既遠通  
書問以無緣茲者蒙易近藩匪遥台席雖未得就諸生  
之列請益於詩書猶足以聞長者之風仰高於道誼始敢

修牋記叅候之禮庶幾將心誠饑渴之勤載省孤蒙實  
為幸會屬晏陰之在序當嚴氣之方升仰惟吐納之宜  
無爽燕閒之喜伏惟判府相公言為著蔡行應準繩茂  
勞烈於三朝聳儀刑於四海韓侯之偉革金厄暫殿方  
維周公之衮衣繡裳佇還鈞軸更冀上為邦國善保寢  
興禱頌之誠叙陳罔既

賀韓相公赴許州啓

右翠啓伏審遠持信瑞入奉清閒假泰筮以諏辰命倌

人而飭駕百靈奔衛宜無陟降之勞六氣節宣當遂神明之適伏以判府相公材為人傑行備天常出堯舜之盛時紹韋平之慶闕忠純之操簡注於三朝愷悌之風儀刑於四海比輟廟堂之任少留藩輔之雄力抗至言屢辭於榮祿眷求舊德方屬於上心用均邊閭之勤就易鄉邦之便儻草金厄已嚴入覲之裝袞衣繡裳行先公歸之望佇膺典冊首秉鈞衡羣處勢多竒誤知最久持心素厚未忘墜屨之微引脰永懷已動掃門之喜更

冀上為宗社善保寢興

授中書舍人謝啓

右翬伏蒙制命授前件官者竊以贊為明命資討論潤  
色之工服在從官備諛度詢謀之用屬非常之興運經  
不世之大猷方追三代之風以建一王之法其於講求  
體要裁正典章出獨斷之淵深號積年之希濶所以訓  
齊羣下播告四方非究極於人文曷宣明於上意矧參  
獻納尤慎選掄如翬者識慮少通襟靈多蔽徒恐隳于

先緒頗能味於經言有顛愚好古之心自知迂散無廣

博為人之學分甘棄捐顧

一作嘆

齒髮之已衰困風波而

且久晚逢真主獨賜誤知取於寡與之中假以踰涯

之寵俾專史法非薄質之能堪遂掌訓詞豈謏能之可

稱況策名於近要預責實於論思揣已以慚瘝官可畏

何緣致此固有繇然茲蓋伏遇某官翼亮天功彌綸庶

務仁接於物每樂育於時材誼在承君故旁招於衆俊

致茲頑鈍獲備甄收惟殫許國之誠彌堅素志庶答知

人之遇不在他門

賀提刑狀

右鞏伏審祇奉詔恩總持使務伏惟慶慰伏以提刑屯田  
躬高明之德席熙盛之期起收科榮光映朝序發明吾  
道則有文章之深淳推行當時是為治行之尤異果膺  
迅用以先僉言自江之東握節而使固將粹美於風俗  
豈特是正於刑書不次之陞為端於此鞏獲分郡寄得  
與公庥幸喜之深叙陳罔既



太平州回轉運狀

右鞏伏念鞏夙惟孤質最荷誤知屬仗節以來思得通名而覲止辱為殊禮尤出過恩委曲拊循丁寧顧訪軫艱難於即路則許之假寵於舟艍憫匱乏於騰裝則期以致憐於教墨側思寒陋何用克堪聚集感慚豈勝指數去違再宿懷嚮兼年伏惟通久禱於萬靈亨洪休於百順竊以運使郎中受材閎廓經德粹冲布盛府之詔條樹外臺之風績洽於人望簡在天心行被命書即膺

遠用伏惟順遵氣節安養寢興

太平州與本路轉運狀

右翬啓伏念更移歲序阻越道途音塵莫及於賓階書  
問不通於記室飛馳積思徯仰風威伏惟順履川流安  
行舟御享神明之協相具福祿之來成伏以運使郎中  
德紹家聲材周世用雋望傾乎天下壯猷藹於朝端建  
使者之節旄宣揚惠澤佐大農之計策蕃長貨財拊勞  
烈以甚隆席寵靈而宜厚竚膺詔召以協輿言伏惟上

為朝廷善綏寢饋

越州賀提刑夏倚狀

右鞏伏審祇奉詔封榮分使節伏惟慶愜伏以提刑屯  
田抱材精敏涵德粹溫文章為國之光華治行迺時之  
表則輟於朝著處以使臺士望藹然時名籍甚官用視  
年之豐耗已寔倉儲邦刑以世而重輕竚清獄繫使仁  
聲之既治則噐訟之可無然後入奉命書進升法從在  
於公議實允輿情鞏於此備官云初託庇喜趨風之甚

邇諒考履之惟和更冀副工倚毗順時調護其為禱頌  
曷究敷陳

賀轉運狀

伏審祇奉詔封就更使節伏惟慶慰伏以運使司封受  
材閎遠植性粹冲風猷為世之表儀治行迺時之軌則  
果用詳刑之最來分將漕之權威名已動於連城惠術  
行周於比戶豈上調盈虛於歲計內足邦儲方且知緩  
急於人情下流主澤然後進陪侍從入奉詢謀在公論

以猶稽實輿誠之所係翬備官於此託庇云初將承望  
於餘光但忻愉於懦思屬祁寒之在序諒福履之保和  
敢冀上為朝廷善調興寢禱頌之至叙述奚周

賀杭州趙資政冬狀

右翬竊以布律而候氣萌動於黃宮立表以須景長至  
於南極伏惟知府資政受材闕廓含德粹純壯經國之  
大猷濟格天之盛業履茲令序茂集休祺典冊衮衣竚  
履一作復三公之位旂常鼎鼐當傳萬世之功翬祇服官

歲遠違門著素積依歸之望彌深禱頌之勤

賀北京留守韓侍中正旦狀

右翬伏以歲起於東茂對三陽之盛物生於震聿開萬  
化之端伏惟某官行應中和道含純粹屬四方之係望  
簡三后之眷懷德為民彛故稱宗廟之器功在王室是  
為社稷之臣順履昌期具膺繁祉佇奉承於典冊復登  
翊於巖廊翬限守印章阻趨墻屏仰望威重不任禱頌  
之至

賀鄆州邵資政改侍郎狀

右鞏竊審祇被明綰進陞寵秩伏惟慶慰伏以安撫資  
政侍郎材經世務文擅國華攀日月之高衢踐機衡之  
要地方兼榮於祕殿用均逸於价藩屬時靖嘉維上豫  
動訪昔遊於博望懷舊學於甘盤廼陞宗伯之聯居貳  
卿曹之重惟隆名異數之錫已絕當時固元勳盛德之  
殊豈稽圖任佇還柄用式允輿情馳慶未繇依歸滋劇  
聚州回相州韓侍中狀

右翬僻守陋邦遠違嚴屏永言嚮慕但傾茅塞之心自  
便退藏莫馳竿牘之間敢期賜教出自過息形意愛之  
拊循枉題評之獎引譬如寒谷幸蒙六律之吹有若秋  
毫遂借千鈞之重秘藏巾衍銘鏤肺肝惟偃息於便藩  
素充盈於浩氣百神所相萬福來綏伏以司徒侍中行  
應準繩言為著蔡肩一心之忠誼弼三后之謀謨安社  
稷之元功傳於竹帛被華夷之盛德布在管弦方且辭  
鈞軸於廟堂擁旌幢於鄉國然而人詠方叔克壯元老



之猷時思謝安出慰蒼生之望宜就贊書之拜佇諧華  
袞之歸

回樞密侍郎狀

右翬啓伏念翬久茲外補利在退藏一切不為京師之  
書以此亦踈左右之間分當棄置理絕收憐豈期尚記  
於姓名特賜親紆於翰墨處大寒而不變乃知松栢之  
堅兼庶類而並容則維江漢之廣孤懷易感重誼難忘  
但注仰於門闌實鏤銘於肺腑今者景風扇物畏日御

躔伏惟襄贊萬機順膺百福敢覬上為邦國善保寢興  
禱頌之誠指陳難既

回亳州知府諫議狀

右翠伏念自違墻屏浸易歲時比潛伏於外邦久棄捐  
於人事雖嚮往之意不暫弭忘而叅候之勤至於曠絕  
敢謂曲敦雅舊尚記庸虛賜勞問於華牋致恩勤於親  
筆文如黼藻加一字以為榮操若松筠貫四時而不改  
以慙且感欲報奚言今者竊審固避機衡出臨屏翰始

敢滌茅心之至懇具竿牘之常儀少贖曠踈覬蒙開察  
蓋天時之迭運屬春令之方行伏惟開閣之初偃藩甚  
樂休有神明之助茂臻福履之宜鎮撫名城暫屈承流  
之寄旋歸宰路竚膺圖舊之求更惟上為宗祊善調寢  
餼禱頌之至但切下情

回運使郎中狀

右鞏啓伏念鞏仰高所至馳思為深戀勢之殊屬書以  
進枉過恩之特厚流華問以見存文辭爛然意氣勤甚

雖德心之大遺名秩以自謙而士品之微顧材資而安  
稱其為佩服曷罄指陳急景云初祁寒將盛伏惟遵道  
塗之易詢采於風謠察閭里之勤布行於德惠神靈所  
護福祿攸宜恭以運使郎中材足無人志存及物出高  
明之慶族接熙洽之盛期通班於朝揭節而使自簿書  
期會之纖悉莫不注心至山巖窟穴之幽深舉皆受賜  
足以救一時之敝故能得萬事之宜休聲所歸遠用行  
及伏惟遵時之順養氣以恬庶允輿人之情不違拙者

之望

到任謝職司諸官員狀

右翬比者祇命守邦消辰視事維是孤蒙之質幸依庇  
冒之餘竊翬才不逮人學多泥古久備官於冊府徒竊  
食於累朝茲假便藩實緣私請伏遇某官體仁為任充  
美在躬素自結於主知方出宣於使指歛時利澤播在  
東南籍甚休聲洽於中外顧忝屬城之任實諧德宇之  
依尚阻參承但深欣抃

福州回曾侍中狀

右鞏伏念自遠門闡荐更時序顧茲艱拙利在退藏雖  
有心誠嚮往之勤而無書寄候問之禮敢期眷與特賜  
誨存獲承黼藻之褒彌見松筠之操其為感激但切銘  
藏屬凝洹之在辰惟燕閒之均福伏以致政太傅侍中  
素推人傑蚤代天工意誠心正而家齊已儀刑於王室  
功成名遂而身退遂表則於士倫聊曼衍以窮年坐優  
游而進道矧臧孫之有後繼周公之拜前阿衡之格于

天書載君臣之德司徒之善其職詩稱父子之功方賴  
壯猷陰禔至治更冀上為邦國善保寢興禱頌之誠不  
勝懇悃

移亳州回人賀狀

右鞏比緣懇請得假善藩既諧竊祿之私實獲事親之  
便慙無善政可稱厚恩豈謂某人特枉緘封曲垂獎錄  
言為黼藻飾陋質以為榮操若松筠處大寒而不變其  
為感愧曷盡指陳惟溽暑之方隆諒燕居之多適更祈

保攝用竚遷陞

東府賀冬狀

右翬伏以氣動於微升一陽而方長物資其始萌萬寶  
於將亨伏惟某官行蹈中庸業存久大為生民之著蔡  
任王室之股肱四岳之亮天功其凝庶績百揆之熙帝  
載攸叙彛倫茂對休辰具膺繁祉翬方祗官次阻詣門  
闌

西府賀冬狀



右鞏伏以物資其始萌萬寶於將亨氣動於微升一陽  
於方長伏惟某官業存久大行蹈中庸為著蔡於生民  
任股肱於王室共武之服久專總於樞機秉國之均佇  
首當於衡軸對休辰而茂協膺繁祉以具宜鞏限此守  
邦末緣為壽

回人賀授史館修撰狀

右鞏誤被上恩進專史事顧慙孤陋曷稱選掄伏念鞏  
齒髮蚤衰材資素薄差池一紀久流落於風波推徙七

州寢沉迷於簿領詎期皓首獲奉清光拔於多士之中  
寵以非常之遇惟累朝之盛典垂列聖之鴻名宜得異  
能使之實錄豈伊鄙鈍可盡形容懼莫副於簡求方內  
懷於兢愧敢意眷私之厚特迂慶問之勤矧獎飾之踰  
涯俾寅緣而借重其為感幸難既敷陳

回人賀授舍人狀

右翬啓叨奉制恩進登詞掖誤蒙任屬私積兢慙翬器  
識少通性資多蔽非有為人之學徒堅好古之心矧齒

髮之已衰困風波而且久晚逢真主獨賜重知取於寡  
與之中假以踰涯之寵甫專史筆遂掌訓辭惟清切之  
近班實論思之要地方驚冒處良用愧顏未遑削牘之  
勤遽辱騰書之貺其為感佩曷罄敷陳

欽定四庫全書薈要卷一萬四千五百九十六

集部

元豐類藁卷三十八

宋 曾鞏 撰

祭文

祭歐陽少師文

惟公學為儒宗材不世出文章逸發醇深炳蔚體備韓  
馬思兼莊屈垂光簡編焯若星日絕去刀尺渾然天質  
辭窮卷盡含意未卒讀者心醒開蒙愈疾當代一人顧

無儔匹諫垣抗議氣震回遙鼓行無前跋躗非恤世偽  
難勝孤堅竟室紫微玉堂獨當大筆二典三謨生明藏  
室頓挫彌厲誠純志壹斟酌損益論思得失經體慮萌  
沃心造膝帝曰汝賢引登輔弼公在廟堂尊明道術清  
靜簡易仁民愛物斂不煩苛令無迫猝棲置木索里安  
戶逸積斂兵草天清地謐日進昌言從容密勿開建國  
本情忠力悉卯未之歲龍駕颺欵再極大艱垂紳秉笏  
乾坤正位上下有秩功被社稷等夷召畢公在廟堂總

持紀律一用公直兩忘猜昵不挾朋比不虞訕嫉獨立  
不回其剛化佗愛養人材獎成誘掖甄拔寒素振興滯  
訕以為己任無有廢拂維公平生愷悌忠實內外洞徹  
初終若一年始六十懇辭冕黻連章累歲乃俞所乞放  
意丘樊脫遺羈馽沉浸圖史左右琴瑟氣志浩然不陋  
蓬華意謂百齡重休累吉還幹鼎軸贊微計密云胡傾  
俎愍遺則弗聞訃失聲皆淚橫溢顛冥不敏早蒙振袂  
言繇公誨行繇公率戴德不酬懷情獨鬱西望轎車莫

持紉緋維公犖犖德義譔述為後世法終天不沒託辭  
叙心曷能髣髴

祭王遠龍圖文

惟公有獨立之志不羈之材揚旌闔楚按節江淮止如  
山淵動若風雷衆皆異其施設曾孰測其津涯若夫拯  
急難於水火下雋傑於蒿萊越拘孿而不惑豈淺狹之  
能偕至於稱物引類興言寓懷遠叅騷雅近雜嘲諧麗  
兼組藻美軼瓊瑰皆足以聲駕多士望隆九陔然而位

不過郎中名不過直閣流落白頭委蛇一壑豈人事之  
當然信命存於冥漠昏愚不肖早辱公知拊循愛勉施  
及其私聞公之逝惻楚歔歔戴德莫酬寓薦以辭

祭張唐公文

熙寧六年六月一日

維公作德于躬實方實厚實夷實訥實堅實茂彼嗜而  
爭我有不惑彼媿為朋我肆而特我抗其辭維彼之默  
始慙其華儒林禮官廼碩其實侍從之班維帝時咨維  
士時附尚其昌言式久在序告疾于朝廼長南服里無



嘆聲士女輯穆以老得謝俶其歸裝車御未驅訃聞四方維余先人公同年友公子我姪又託婚媾實肴于豆實酒于觴馳辭告誠維以永傷

祭孔長源文

嗚呼長源拔迹孤艱刻志勵力升德自幽迺不家食燕其壽母歸養以色興其士友歧我淳則微獨考古載辭于策亦從爾知有婉軍畫為長以舒為將不亟迺使荆粵銓材著職滅熄苛媯蘇僵博瘠會稽之治里無猝迫

初以詆去民實戴德卒還省部廷論之直維曰將歸東  
符之析孰云不幸奄與生隔有親九十世為楚惻維其  
篤行匪矜匪飾其彪為文其需為澤天與厥後賢能交  
蹠有實有華光長譽白善豈無勸慶焉茲得維我與公  
綢繆平昔詩書討論相求以益我試于鄉自公考擇彌  
久彌親情隆意獲聞公之訃泣然心盡馳莫千里寓陳  
悃悞

祭王平甫文

嗚呼平甫決江河不足以為子之高談雄辯吞雲夢不  
足以為子之博聞強記至若操紙為文落筆千字徜徉  
恣肆如不可窮祕恠恍惚亦莫之係皆足以高視古今  
桀出倫類而況好學不倦垂老愈專自信獨立在約彌  
厲而志屈於不申材窮於不試人皆待子以將昌神胡  
速子於長逝嗚呼平甫念昔相逢我壯子稚間託婚姻  
相期道義每心服於超軼亦情親於樂易何堂堂而山  
立忽泯泯而颺駛訃皎皎而猶疑淚汎汎而莫制聊寓

薦於一觴纂斯言而見意

祭宋龍圖文

嗟乎次道公之

一無於古今典章沿革得之於心山藏

之字於古今典章沿革得之於心山藏

海積又於舊聞隱顯纖悉折之以口天高日白公在朝廷羣公百司解惑釋疑公為著龜公在太史維僚與屬正繆辨訛公為耳目今公亡矣廷有大議問故事者衆失其歸國有大典考前載者人失其師況公行不絕俗而動有常度言不忤物而辭無可疵靖退之風愈老而

彌邵方直之操自信而不回至於篤友尚舊比義親仁  
追往烈而競逐豈庸態之能隣然而蚤蹈厲於儒館晚  
委蛇於從臣曾未得歷禁林之獻納任廊廟之彌綸何  
鸞儀而鵠峙忽颺逝而星淪哭公之喪者客不絕於門  
庭弔公之家者使相望於道路維昏鈍之少與獨綢繆  
而有素淚淋浪而莫收情怛怛而奚愬嗚呼唐季五君  
史曠其錄公蒐亡而集賈蓋旁羅而遠屬至於帝宅神  
州祖功宗德咸在筆削具存方冊爭日月之光輝與天

地而終極則公位雖屈而未盡名益久而愈章彼富貴而磨滅豈得公之毫芒纂餘哀而以此聊寓薦於一觴

祭亡妻晁氏文

子有仁孝之行勤儉之德宏裕端莊聰明靜默窮達能安死生不惑可以齊古淑人為世常則歸我之昔明年始筭言無疵悔動應衡規親踈悅慕稚艾嗟咨事姑之禮左右無違服難體順惟日孜孜諧我屬人又篤以私有犯不校有勞不施人隆已約乃以為宜衣有穿敝珥

無光輝曰順吾性餘復何為紛綸世務偪仄羣疑子陳  
得失効若著龜及其既退婉婉其儀不矜以色不伐以  
辭幽間深謐度量誰窺吾貧口衆智不繼資脫粟藜藿  
具無鹽醯人不堪憂子獨怡怡縮綜雖愛不偏以慈訓  
誨惟謹曰宜幼時我扶我翼共處窮羈鋤荒補漏細大  
無遺嗚呼天禍我家降集凶厲始來京師辛丑之歲子  
之方壯疾疹中傷孰云此日一女先亡子雖自達病豈  
宜然自秋至春有益無痊迎醫市藥我力為殫術寧非

善不勝於天將逝之夕逆知其期語論自若精神不衰  
徧召室人告以長歸嗚呼哀哉父失賢女姑亡孝婦子  
喪嚴師吾虧益友時歲雖往悲酸則新禫月之終奠此  
一樽教養二子期獲子心時良返子託葬先林言如不  
復誰為我人長號叙哀寓以斯文

祭晁少卿文

鞏蚤以孤蒙與託嘉好自始迄今踰二十載繼繼相與  
義厚情親會合乖闊則有書問開紙披辭猶若際遇不



意今者公遽淪亡得訃歔歔涕隨聲發海濱獨哭心與  
誰言仍聞歸旆旅次餘杭隔此濤江寓陳薄奠公乎知  
否已矣奈何

館中祭丁元珍文

嗟乎元珍別子幾時孰謂子往無復來期子之為人渾  
厚平夷不阻為崖不巧為機朋僚悅附族黨懷依其動  
恂恂必應繩規其語諄諄不見瑕疵從事之畫吾無妄  
隨長人之政彼有遺思其蓄釣石其出銖錙惟夫學問

富有書詩濡墨操紙寫之文辭春陽滿野萬物榮滋匪  
營匪飾疊異并竒既精衆作於詩復尤清新俊逸與古  
為儔讀之灑然可破百憂哀烏之秩天祿之遊謂淹已  
久既晚方收孰云未幾斥置南州書猶未復計已來投  
衆為哀傷況於吾屬初疑終駭哭淚滿目莫紉子棺莫  
綖子服禮多不及情豈能忘寓辭千里侑此一觴

朝中祭錢純老文

嗚呼公乎窮經及史旁兼百氏廢寢與食不虛寸晷篤

好無倦華顛愈勵強記多識箱輸屋侍閣議崇論河垂  
海委詩賦講說射策三科金馬玉堂經帷三職寒苦自  
至無馮與翼銓綜再試士曰予歸尹正三歲衆曰予依  
公於所聞維學之力公於所知則維自得利害之際人  
鮮能安彼為惴惴公獨桓桓愛惡之情人鮮自克彼有  
贅虧公為衡石世所並逐公有不求彼器我靜則莫我  
尤魯不三事位云未究魯不百年數云非壽殲國之良  
在列嗟咨隕民之望耄艾歔歔天子聞喪馳使臨視勞

恤斃孤凋憐乏匱凡我同朝矧曰同志哀由感觸孰知  
失涕寓馬在庭薦羞在几公乎來哉寄誠茲誄

祭李太尉文

公先種德碩大于父母宋仁祖維莊懿后公維后姪考  
異姓王入長六師外垣大邦不以貴盈遜悌慈良昭陵  
未遠公奄云亡轎車之東致薦一觴

祭致仕湛郎中文

維公蚤以郎潛安於養志晚而家食曾不待年治績紀

於朝廷行實推於鄉里綸亡未遠寔宥有期竊仰高風  
敢陳薄奠

又祭亡妻晁氏文

翬無狀遭禍早失賢妻徘徊京師零丁孤宦廼致旅櫬  
未就先塋夙夜思維心顏愧怍今蒙恩補外道出東南  
敢啓敢宮進登舟御間闕回阻將致鄉園而翬比至淮  
瀕迫趨官守其於奉承靈輦經涉大江方復假人經營  
護視永惟見亮尚賴有靈若夫觸冒川途幾數千里使

保清謚則惟餘休至於推擇吉辰修嚴葬禮俟得時日  
敢不躬親惟其鑒之故以情告

代人祭李白文

子之文章傑立人上地闢天開雲蒸雨降播產萬物瑋  
麗瑰竒大巧自然人力何施又如長河浩浩奔放萬里  
一瀉末勢猶壯大騁厥辭至於如此意氣飄然發揚雋  
偉飛黃馭馭軼羣絕類擺弃羈帛脫遺轍軌捷出橫步  
志狹四裔側睨駑駘與無物比始來玉堂旋去江湖麒

麟鳳凰世豈能拘古今僻儒鉤章摘字下里之學辭卑  
義鄙士有一曲拘牽泥滯亦或狡巧爭馳勢利子之可  
異豈獨茲文輕世肆志有激斯人姑熟之野予來長民  
舉觴墓下感嘆餘芬

祭王都官文

維公材敏而宏志眎萬里高辭大篇出仕天子主簿於  
閩聲駕其長清江之謀矯矯逾壯于韶于昇條教出已  
伺公所為萬目齊眎奪奸于幽耆吏喪膽悍黨睢睢根

抵卒斬里謳戶歌惟惇寡獨在右惟監在下惟屬在側  
惟僚相講戴服將起將昌俞考以難曷赴曷歸忽殞無  
還公於先人實歡實厚至公諸子翬辱親友於公家行  
表裏洞知於黨不校於尊不違出升公堂不撓毫髮退  
從其私婉婉曲折鍾山崢嶸下惟江水昔公此臨委蛇  
烏履今子六人葬公于此銘翬之為辭貧事偉千里寄  
誠以茲一簋

祭素大監文



於乎越蜀荆吳三方萬里公馬駢駢幘印而使蠻墟海  
聚獄無濫辭我戕劫貨走京師東南之粟風颺手筭  
歲填太倉萬艘尾錯遂副會府肆其心畫出屏于宣以  
我偃側九卿之行得謝以歸冕弁入里昔時布衣進退  
則然當世所嗟不貴以驕不富以奢翼翼其行坦坦其  
衷隕然順退長者之風白髮雖多几杖未隨箴言在耳  
已哭于帷眷然撫我孰如公尤先人不幸託載公舟我  
生方也戴德莫疇羞醜則微以陳我悲

祭闕職方文

嗚呼闕公以文中科以材為吏艱于厥初四十始仕終  
領兩州其治大肆告老于朝即官以歸卿士大夫觀望  
嗟咨孰為公居竹水之寰孰為公園正據湖山公出公  
休八子侍側仕者大半同時共籍其聲顯揚其習順慈  
萬石之風百世相差有後如斯世誰能及而況公年躋  
于八十或如公壽莫如公安履勞撫少其意桓桓拜公  
以晚見託以姻書猶在几訃已及門福祿之全在公奚

憾念昔思來族親之感吊廬在東遠不及會泣叙斯文  
千里之外纒縷之情已於一酌

祭黃君文

嗚呼宋且百年號令萬里姦臣黜除尤者擯死巖材里  
秀驅駕而使蓋君之生有時如此當世之官有微有盛  
盛者廟堂斟酌王命千隸百司進竦退聽出長四方玉  
斧金乘邦侯衆將傳牒而令微者紛紛或陪或正千品  
萬名各有操柄人皆敏手捷取能併君獨無求以死終

病同時之人勤營善蓄萬籛儲金萬襲藏玉遺餘野積  
不能墮積君獨一身衣食常感茲非其命曷以至茲君  
能自達可以無悲親戚念君能不歔歔我之老姑歸君  
為婦與君歷年顛沛同有今對其孀寧匪我傷來問來  
弔屢至其堂葬君南山冬氣已烈薄醪時羞觴豆肅設  
侑以茲文與君一訣

元  
豐  
類  
彙  
卷  
三  
十  
八

欽定四庫全書薈要卷一萬四千五百九十七

集部

元豐類藁卷三十九

宋 曾鞏 撰

祭文

先君焚告文

鞏蒙昏不肖不能稱先君教誨養育之意賴遺德所及  
嗣有官祿以世其家今天子始見郊廟加恩朝臣以及  
其先而先君先夫人咸有官封追榮之賜鞏繫官京師

謹遣弟布肇奉告第至墓次以告

皇妣仙源縣太君周氏焚黃文

鞏薄陋獲守緒業常懼失墜賴先君先夫人之餘澤列  
位於朝今天子始郊加恩羣臣皆得追榮其先故先君  
先夫人咸被命書贈官封邑鞏伏念厥繇不任感慕隸  
職京師遣弟布肇奉告焚黃詣墓次以告謹焚

皇妣昌福縣太君吳氏焚告文

維先君先夫人積德累善鞏獲蒙餘澤備位於朝今天

子始郊加恩羣臣皆許追榮其先故先君先夫人咸被  
贊書命官封邑而鞏方羈於職事不得躬至墓下謹遣  
弟布鞏奉告第以告

戊午十月展墓文二首

鞏去春在江西蒙恩予告得省視松楸今自福州被召  
還朝又得便道展拜墓下敢陳薄薦用申感慕仰惟降  
鑒俾蒙福於無疆

鞏自福州被召還朝得便道展墓敢陳薄薦

以下同上



代太平州知州謁廟文

天子不以某不敏使有茲土凡境之內鬼神能福於人  
敢不恭事今得日之吉始茲薦見惟神之賜使民宜其  
家及其歲事則某敢不繼自今具酒醴牲牲以報於神  
神其鑒之

太平州祈晴文

去歲之水其為害大矣民之免於死亡而不為盜賊亦  
幸而已矣水之既去民於完隄防脩疆隴以從事於田

其艱且勞亦甚矣使今歲大穰恐未足以復其力今苗  
始蒔而雨不止若將又病之民有轉死之憂吏之不能  
事神治民以降茲沴不敢逃其責然沴之既降非吏之  
所能扞而止也惟神舊依吾民而食於此土扞患除菑  
固神之職敢不以告使雨速止而歲有成亦惟神於此  
土永有依歸惟神其圖之

泰山祈雨文

維泰山歷古至今有天下者巡狩封禪勒成告代莫不

之焉或企足動容卒莫能至實卓瑋殊尤神明之地故  
天下宗焉二典所記其光靈威烈焯示萬世夫豈他山  
可得而視維齊與魯獲仰而事粒食縷衣莫匪陰施今  
二邦不雨自四月以訖於茲積水之澤塵起冥冥粟將  
稿死蝗亦滋生雖政或不良足以致此而百姓何罪宜  
見哀矜彼撮土之山勺水之川尚能與民為福錫之有  
年豈如泰山朝出一雲暮澤天下其勢之易易於轉圜  
而比近託麗顧不能憐殆莫之或告告或不虔夫民之

生蓋亦艱矣無儲與藏重斂煩使歲一不登多濱於死  
奸強無知或起乘時聚為盜攘以取誅夷循理安業田  
間之民亦與俱亡奚可不傷輩受命天子守藩於東敢  
齋以嚴告於靈宮惟神閔人之病助歲之功霈然下雨  
變沴為豐尚俾斯民以牛羊黍稷得承事於無窮

泰山謝雨文

臣愚行為時之所背言為時之所輕寡儔少和眇眇煢  
煢竒於人而如此敢望信於冥冥屬東轅而進謁託斯

文而薦誠眷齊魯之舊邦依大鎮之崢嶸苦旱魃之方  
驕憂歲事之不登民且瘠於溝壑或椎埋而死兵冀聰  
明之響蒼霈膏雨之宵零言丁寧而上訴心恟恍而潛  
驚顧不能以諧世將何動夫威靈乃不知夫神與道而  
為徒雖宵默而難明其虛心也物有來而必應其公聽  
也無憎愛之常情彼大雖自大小雖謂小吾與善而已  
矣常一視而持平故微衷得以上徹利澤為之旁行或  
噫為風或震為霆隱然雷出靄然雲蒸灑甘霖以兼夕

滅害氣於無形蓋西極於甸服東屬乎滄溟人盈其望  
物遂其生黍芄芄而擢秀粟蕨蕨而敷榮使時沴遂熄  
年功可成人食豐乎鍾黼神祀衍乎塗盛民相安於田  
里吏無用於威刑信大恩之莫報而至德之難名愚所  
以意激而感深者方涉世之零丁荷降鑒之不昧知忠  
信之可憑敢因辭而進謝愧抽思之非精

齊州到任謁舜廟文

維帝側微之初躬耕此土歷數千載盛德彌新傳於無

窮享有廟食鞏受命出守敢陳薄薦維帝常垂陰施惠  
此困窮庶使遺民永有依賴

齊州謁夫子廟文

惟夫子言行之所以一作及蓋不可得而學者師仰各以

其一無其字材之所及而已鞏潛心久矣茲者受命撫封進

謁廟下敢陳薄薦式遵典禮

齊州謁諸廟文

維神以功德之美列於祀典受命守土敢陳薄薦惟神

常垂陰施以惠此邦

泰山祈雨文

惟神含德體仁鎮茲東夏興雲致雨澤施八紘今此齊  
邦近在山趾方夏久旱麥苗將萎吏思其繇奔走羣望  
而人微言賤不能上動頻陰復散忽已兼旬念此疲民  
弊於征斂方歲之富食常不足一遇裁害早捐溝壑惟  
神威烈覆被羣生顧此比州宜先蒙賜豈伊靈眷獨忍  
遺之余用是飭遣士民布誠祠下情窮詞急冀獲哀矜



使一雨霈然則倒懸可解尚其降鑒無作神羞

嶽廟祈雨文

去歲之早有請於神蒙畀嘉澤田則大稔今春河役發  
民二萬更迭齋送衆又倍之蓋此齋人出者幾半迨其  
反室維夏之初勞費既深又違穡事夫民數歲乃遇一  
稔敝之如此其幾尚完今二麥方苞而亢陽為虐吏任  
其咎所不敢逃惟民何辜賴神終惠能致雲雨則實在  
神尚其念之故敢以告

襄州謁文宣王廟文

鞏獲承餘教列職書林來守此邦敢遵常禮躬謁祠下  
尚其臨之

襄州謁諸廟文

惟靈功德在人廟食茲土鞏到官之始敢脩禮謁尚期  
降惠以佑吾民

襄州諸廟祈雨文

今麥苗方出而時澤尚愆冬令久行而寒氣未應嗟吏

治之不善以奸陰陽惟神理之無方能興雲雨是用兢  
慚以任咎蠲祓以乞靈尚期降休以荅人望

大悲祈雨文

維歲孟冬盛陽猶亢旱暵滋久陰寒未興吏非循良敢  
不任咎佛有慈惠則宜降祥是敢躬瀝懇誠虔祈覺蔭  
俾風雲之奮作致雨雪之漸涵田畝順成里閭安輯仰  
期真理俯徇輿情

襄州嶽廟祈雨文

自秋不雨方冬尚溫麥田苦於旱乾民室憂於病癘永  
惟責任內集兢慚惟神作鎮岱宗著靈南夏敢瀝由  
衷之懇冀回降鑒之仁遂俾膏澤以時祁寒式序眵  
晦克諧於豐富里閭皆保於靖康尚其垂慈副此羣望

又諸廟祈雨文

去歲之冬時雪不厚今茲春晚膏澤尚微農於稻田待  
水而種苦茲旱涸人用焦然更不能有惠於民而惟歲  
之善則刑清事簡尚有望焉是用瀝懇有禱於神惟神

依人尚其降鑒使霈然下雨以大濟於此邦則人於事  
神亦曷不盡

薤山祈雨文

自去秋之始至於今春之暮雨不霑霈今麥苗將病稻  
種未布農事急矣而禱請未効惟神靈應在人是用奔  
告尚其降鑒大施澤於此邦使民獲善歲而不罹於艱  
阨則人於報神之賜亦曷敢不虔

邪溪祈雨文

自去秋至今雨常不足今麥苗將槁稻種未布而春既盡矣若又不雨至於十日則麥必盡死稻不可種民將安所寄命乎吏知其急而不知其所以為神知其急而力能為雨者也其亦何惜數尺之澤救民於無所寄命之急乎故敢以請神其鑒之

諸寺觀謝雨文

向者以大田之稼雖多而西郊之雲方密輒伸虔禱蓋以為民甫及夏初霈然蒙潤茲展至誠之謝式遵舊典

之傳欽惟明神鑒此精意

邪溪謝雨文

吏能奉法令治獄訟督賦歛而已導和氣致豐年則力不能德不及也故一有水旱則奔禱於鬼神幸蒙降咎則自恕以竊食此輩之所不敢不自訟也今茲請雨不能異此獲神之賜敢不虔報惟神之靈德既足以驚動澤施於此民尚終畀之有年則神之依人亦有永賴

薤山謝雨文

迺故秋至今雨不需足麥苗將稿稻不可種民將無以  
為命吏不知其所為維神能出雲致雨記於古經信於  
百姓之耳目是用奔告果蒙降沓迺戊辰雲起西北至  
夕大雨達於甲戌四境告足麥則滋榮稻可播種民得  
以託命吏得以竊食維神之威靈大顯於此土澤施大  
及於斯民敢不嚴報尚其終惠俾歲大穰則人於事神  
永永其不敢怠

諸廟謝雨文



吏治不能順陰陽時風雨而以歲之旱奔告於神賴神之靈時賜甘雨敢不嚴報尚其鑒之

元豐類藁卷三十九

欽定四庫全書薈要卷一萬四千五百九十八

集部

元豐類藁卷四十

宋 曾鞏 撰

祭文

五龍堂祈雨文

迺四月以旱禱於邪溪薤山應時得雨麥以豐成稻可  
播種獨異於他境實維其賜今稻田又乾矣此邦之人  
皆謂龍虎之河五龍之神禱雨輒應余敢不告神其降

鑒大施澤於斯民使獲有年則人於報神亦維無斁無  
俾薤山邪溪專美於此邦以作神羞

靈溪洞祈雨文

吏不勝任薦致旱苗禱於山川為黷已甚然稻田日瘁  
民命所託夙夜憂懼不知所為維爾有神世載靈德是  
用覲顏有請忘其慚羞尚其降祥時賜甘雨俾歲無害  
維神之休

又大悲祈雨文

盛夏在辰常暘為沴稻將萎瘁人用嗟憂繇吏治之不  
明致奸和氣維佛乘之無礙善濟羣生是敢同被精誠  
虔祈覺蔭覬滂沱於膏澤俾浹於原田用救焦枯實  
依慈惠

大悲謝雨文

民無常心惟安於足食佛有慧力善救於含生比緣盛  
夏之辰久苦驕陽之沴懼傷稼穡將致凶饑故仗節之  
雋良暨守藩之孤陋俱陳精懇虔對睟容果蒙感荅之

慈立致滂沱之澤滌除害氣勃起良苗變瘁為榮物遂  
更生之理易憂以喜人諧望歲之心維是鴻私敢忘昭  
報尚期降鑒常畀有秋

諸廟謝雨文

吏之罪大矣一切從事於謹繩墨督賦役而已民之所  
欲不能與所惡不能去自恕以竊食不知其可愧安能  
使陰陽和風雨時乎故若輩者任職於外六年於茲而  
無歲不勤於請雨賴天之仁鬼神之靈閔人之窮輒賜

甘澤以救大旱吏知其幸而已其為酒醴牲饗以報神之賜曷敢不虔維神尚終惠之使永有年則神亦無窮有依於人

諸廟謝雨文

積是驕陽莫救稻苗之悴獲茲嘉霽尚滋秋物之榮是荷靈休敢忘祇報

諸寺院謝雨文

比以常暘仰祈真蔭果獲滂沱之澤大蘇焦旱之田敢

擇佳辰特申嚴謝尚期降祐常畀有秋

諸葛武侯廟祈雨文

天子以歲久旱所被者廣分命守臣禱其境內鬼神之  
有靈德在於人者維靈有志於民舊矣故敢以告尚其  
降鑒大施澤於四方以稱天子憂人憫雨之意

諸廟祈晴文

從涉歲以來自春徂夏久陰不解積雨已多今麥待燥  
而成粟待暘而種而雲屯尚密土潤方升民皆竊憂更

用深懼百姓之困甚矣惟神得無念乎尚其開除山川  
相導出日俾歲無害為民之休

謝晴文

比苦雨淫懼為歲害蒙神之德賜以時暘今蠶麥甫成  
里閭相慶敢不嚴報尚祈終惠

諸廟祈雨文

諸寺改作敢干真覺神布  
虔誠惟佛至慈與人為歸

今歲之初未愆雨澤然而麥纔薄稔蠶不甚宜則民  
之窮蓋可知矣今茲農望惟在秋成而溫風方騰旱氣



彌盛是用側身以懼有禱於神尚其降衷時賜甘霖俾  
歲無害亦神有依

薤山祈雨文

誌言衆山雲起此山無雲終不降雨衆山無雲此山雲  
起必降大雨是能為雨能為不雨在神而已今歲數不  
登而旱氣又作吏之不良無所逃罪民貧可閔神能為  
雨而不為是何情哉神其為民出膚寸之雲致數尺之  
雨使凶為穰以救民之急則此邦之人所以報事神者

子子孫孫其孰敢怠尚其念之無作神羞

諸廟謝雨文

比苦亢陽具陳致禱實蒙甘澤敢不昭報

洪州謁諸廟文

惟神播澤在人廟食茲土鞏守藩之始敢脩禱謁尚其  
靈德常庇斯民神於無窮亦永有賴

洪州謁夫子廟文

惟神播澤在人廟食茲土鞏守藩之始敢脩禮謁永惟

聖德覆被無窮尚其鑒茲啟寤學者

洪州諸寺觀祈晴文

佛有大慈速於善應人無常產理則難安惟穡事之將成而淫雨之不止愾然省懼豈敢皇寧蓋茲疲瘵之民已出旱災之後室家凋弊閭里愁嗟如復薦饑將焉託命今早稼甫畢晚苗方興窪下之田已傷稼穡亢爽之地實懼浸淫是敢虔對睟容仰陳淨懇伏望廓山川之曠滯回日月之光華諧此順成湛然澄霽實祈慧蔭俯

慰輿情

諸觀云道實無方物未斯應民惟難保食足為先虔對上靈實繫真蔭謹詞諸廟云神實無方

物未斯應民惟難保食足為

先虔對上靈實繫妙蔭謹告

諸寺觀廟謝晴文

比虞水溢將敗歲功不自皇寧敢陳懇迫果蒙陰施即  
俾時暘田里歡呼粢盛有望惟神靈所以賜於人者豈  
愚足以當之尚冀餘休終成多稼民能自保神則有依  
祭西山玉龍觀許真君

陰功及物靈德在天緬惟真馭之升實以中秋之序人

承餘烈歲即遺祠故茲守土之微敢體愛民之素俾往  
陳於薄具尚永庇於羣生

仲秋告祭諸廟文

歲在仲秋祀有常典維神邁德實庇此邦敢率舊章  
用陳明薦

諸寺觀祈雪文

窮臘未雪方冬尚溫人有疾癘之憂地無膏澤之潤職  
在綏撫心焉震慚敢祈膚寸之雲播為盈尺之瑞盪除

陰氣順致時寒使閭巷消薦瘥之苗田疇成多稼之利  
實依孚佑俯徇微誠

諸寺觀謝雪文

比緣窮臘之期久苦亢陽之沴敢微靈施仰布愚誠蒙  
膏澤之應時致祁寒之協序人無疵癘之患物有豐成  
之祥實賴洪休敢忘昭報更祈密雪尚及餘冬

祭順濟王文

維爾有神克相王師章示見象皇帝侈神之德俾錫號

位秩尊禮盛非以序升今州遣從事即神之祠致皇帝  
命尚其欽哉以對休寵

福州謁夫子廟文

惟夫子之德仰之彌高夫子之言窮之益遠學者潛心  
庶幾髣髴某守邦之始躬即學宮敢修禮謁尚其降鑒

福州謁諸廟文

維神作德自幽信於茲土人用報事秩祭有常鞏甫此  
守邦敢脩禮謁尚其降福終賚斯民

福州鱔溪禱雨文

曰嗟乎旱也誰則為之芘芘之稼將稿而萎嗷嗷之衆  
曷望而依維閩屬者寇賊之罹逮其既附我士已疲餘  
醜成羣百十睚眦跳踉出沒負力乘巖亦有為渠諸偷  
所推相望綦布未受馮羈室家莫寧遠近並疑我蓄以  
柔亦震以威從有法賞不從係累或擾而序或就纏微  
逮歲朔易盪定無遺山林夜行笑語追隨吾人即安含  
糗而嬉士馬亦奮桓桓駉駉天子聖德海邦是綏維此



海邦初亦難

一作艱

饑今宇寧矣師征始歸今食足矣廩

實尚微若歲大熟如梁如茨如京如坻自公及私獄無  
訟繫里無盜闖式於永世方始在茲今此大田既碩而  
齊俾不卒成熟忍為斯神有靈蹟國人所祇神有顯號  
天子所躋姜能起之稿能澤之胡寧有餘歛而不施我  
用卜日早駕以馳即告潭側尚其聽之攘除驕陽騰雲  
曠霓播為甘液霈灑淋漓俾農有秋百物是宜熄偷與  
爭長置刑答人於報事豈有戮思

諸廟禱雨文

常暘為沴將害農功夙夜懷憂不遑啟處敢微靈貺時  
賜膏澤俾人獲濟惟神亦永有依

謝雨文

維閩之人前歲苦饑去歲苦盜足食而安期自今始而  
方夏旱暵懼害穡事茲余用稽於衆蓋可以徼福於民  
者罔不馳告不敢愛力不敢寧居賴神之仁畀以膏澤  
自未至酉遠近周浹維歲大熟可立而需敢飭豆籩報

用典禮吏無明德而但知告其困急於神神既賜之其尚終惠

題禱雨文後

福州元豐元年戊午自四月甲子至五月辛巳凡十有八日不雨田已憂旱太守率屬吏士分禱諸佛祠迎像能致雨者陳之通路用浮圖法為道場率屬吏士羅拜以請丁亥夜五鼓出禱鱣溪屬吏士分禱羣望巳丑率屬吏士蔬食夜四鼓就城南近水祭告后土將為壇祭

龍庚寅蔬食如巳丑夜三鼓就壇壝封鵝祭龍辛卯夜  
五鼓就視牲血以法推之當得雨壬辰就紫極宮壇用  
青童二十有八人更呪蜥蜴如古法癸巳分禱諸祠未  
徧者取黃蘗山龍潭水置道場率屬吏士往請甲午又  
往乙未夜二鼓得雨連三日夜遠近皆有餘蓋自辛巳  
至丙申凡十有六日無日不致禱自丙戌至甲午四境  
多得雨至丁酉乃皆有餘是日罷道場還所迎像及水  
送蜥蜴南澗之濱庚子遍祭謝欲知閩粵之間兼旬不雨

則已憂旱而請禱之為不誣也故刻其祝辭於石而并識之

明州脩城祭土神文

州有帝命繕治城墉得日之良肅工始事斯人允賴維爾土神尚其降休敢不以告

亳州謁諸廟文

維此譙都年歲順而風俗厚者雖人之力實神之助羣獲守此土敢薦樽爵與人為福實待神休

亳州謁夫子廟文

維人之生尊卑長幼有其序悖於理者知有所畏何  
以致然實自夫子鞏長人於此敢不嚴事是用寅薦罇  
爵式遵典禮

元豐類藁卷四十

謹案卷三十七第七頁後五行訪昔遊於博望按  
彭本注云昔一作若

卷三十八第一頁後三行誠純志壹刊本壹作一  
與後初終若一韻複據彭本改

卷三十九第五頁前三行人食豐乎鍾黼刊本黼  
訛黼據彭本改

卷四十第六頁前二行小註實緊妙蔭刊本脫實  
字據彭本增



第十頁後八行實待神休刊本脫此句據彭本增



總校官進士臣胡榮

校對官庶吉士臣翟槐

校對官編修臣楊壽楠

謄錄貢生臣王嘉稷

謄錄監生臣熊輝

欽定四庫全書薈要

集部

元豐類藁卷四十三

一至三

詳校官助教臣常循



欽定四庫全書蒼要卷一萬四千五百九十九

集部

元豐類藁卷四十一

宋 曾鞏 撰

祭文

秋賽文

歲既順成時方孳斂神能施澤以及物人能備物以事  
神茲惟舊章夫豈敢怠庶其為福無斁於人

諸廟祈雨文

今者盛秋已晚庶物將成矧茲麥苗實待雨澤而驕陽  
尚熾畏暑未消野有焦枯之憂人懷膏澤之望敢祈靈  
德俯徇輿情蕩蘊隆之苗以升嚴氣濡滲漉之施以遂  
嘉生實賴神休允諧衆志

道觀 道雖至寂感無不  
通人雖甚愚誠無不獲祭詞

同前改靈德作冲陰改神休作真工 佛寺 佛莫大  
於慈悲在於利物人莫艱於稼穡必也趨時是仰神休  
用康歲事祭詞同改靈德  
作覺蔭改神休作慧心

### 諸廟謝雨文

比籲衆情仰祈靈施果蒙薄雨小潤焦原已祛畏暑之

煩遂適戒寒之漸敢忘祇報更俟餘休克終播澤之祥  
俾獲有年之望

諸廟祈雨文

時寒未若雨雪尚愆麥有立苗之艱人違墻戶之適敢  
依靈德瀝致勤誠惟順導於太和俾霈施於膏澤克諧  
衆望實賴陰休

諸廟謝雨文

比苦愆陽再徼靈施蒙報如響得雨應時澤潤焦枯

蕩除煩鬱物有豐成之望人無疾癘之憂敢忘大恩尚  
覬終惠

祭勾芒神文

宿官於木用事在春敢奉歲祠庶為民福

慈聖光獻皇后百日轉經疏文

至恩難稱欲報者惟盡於精誠大覺可依有禱者必蒙  
於善應敢緣慧力輒罄愚衷伏以大行太皇太后淑聖  
在躬聰明先物儀型宮壺德大而不矜鎮撫國家功崇

而不伐未窮遐算奄背盛辰皇帝陛下務極孝思永懷  
慈蔭內遵喪紀不緣易月而斷恩外異寢園特以因山  
而建號矧惟臣庶實自生成雖銜有慟之情未識論酬  
之所是資佛果少即人心伏願克配坤元寧至神於不  
測寢昌天極介景德於無疆實賴梵因允諧衆望

諸廟祈雨文

民之艱於稼穡賴歲屢豐得以足衣食而償其力吏亦  
得以無所事於勤而偷祿今茲春仲麥苗滿野待雨而



成則民得以繼其豐年之樂而吏亦得豫其幸神之食  
於此土為能澤於斯民也故敢以告尚其賜之以稱人  
望

諸寺觀祈雨文

春氣已中農功方急而膏澤未洽土脉尚乾敢恭致於  
精誠用仰祈於覺道改覺蔭尚其降雨俾獲有年  
作真

諸廟春祈文

神之於人能康歲時而阜庶物故人得以歲時備物以

事神今茲春仲敢遵常典神可不懋以無廢其康阜之  
功則人敢不盡以無斁於事神之禮

祭土祈雨文

農勤甚矣歲既暮春麥待雨而成菽粟待雨而種而旱  
暵為虐人用憂嗟今將為壇象龍以禱是用先事告爾  
土神尚其降休無拂人望

祭五方龍祈雨文

龍之變化無方而其有功於人者則在於能興雲雨鳴

呼今旱甚矣是用稽古為爾某龍之象位於某方董被  
以禱爾尚圖厥職其亟以時肆為膏澤以大施於此土  
無愆厥應俾有後羞惟爾有神亦尚永有依歸

太清明道宮祈雨文

旱踰時矣麥既萎死而菽粟未種皇帝憂勞遣吏分禱  
尚其致雨無俾歲害允茲東睽實在靈德

諸廟謝雨文

維歲大旱蒙賜甘雨窪邪之麥冀可以蘇菽粟之田有

望自此實神之德敢忘昭報尚其終惠俾獲有秋

諸寺觀謝雨文

氣之不若旱實為留蒙在正陽界之甘澤維靈休之所  
自豈昭報之敢忘俾獲有秋尚賴終惠

太清明道宮謝雨文

早久未解詒上之憂得雨應祈曾不旋日焦萎可起種  
藝可施實惟靈休副此東瞻尚其終賜俾獲有秋

亳州明堂後祭廟文

維季秋辛巳天子宗祀英宗皇帝於明堂以配上帝既成禮乃詔天下徧祭於羣神故州得以衆羞醪酒祇薦祠下神其誕降嘉福無有不暨以稱天子所以事神愛民之意

哀詞

蘇明允哀詞

明允姓蘇氏諱洵眉州眉山人也始舉進士又舉茂才異等皆不中歸焚其所為文閉戶讀書居五六年所有

既富矣乃始復為文蓋少或百字多或千言其指事析理引物託諭侈能盡之約遠能見之近大能使之微小能使之著煩能不亂肆能不流其雄壯俊偉若決江河而下也其輝光明白若引星辰而上也其畧如是以余之所言於余之所不言可推而知也明允每於其窮達得喪憂歎哀樂念有所屬必發之於此於古今治亂興壞是非可否之際意有所擇亦必發之於此於應接酬酢萬事之變者雖錯出於外而用心於內者未嘗不在

此也嘉祐初始與其二子軾轍復去蜀遊京師今參知政事歐陽公脩為翰林學士得其文而異之以獻於上既而歐陽公為禮部又得其二子之文擢之高等於是三人之文章盛傳於世得而讀之者皆為之驚或歎不可及或慕而效之自京師至於海隅障徼學士大夫莫不人知其名家有其書既而明允召試舍人院不至特用為秘書省校書郎頃之以為霸州文安縣主簿編纂太常禮書而軾轍又以賢良方正策入等於是三人者

表見於當時而其名益重於天下治平三年春明允上其禮書未報四月戊申以疾卒享年五十有八自天子輔臣至閭巷之士皆聞而哀之明允所為文有集二十卷行於世所集太常因革禮有一百卷更定謚法二卷藏於有司又為易傳未成讀其書者則其人之所存可知也明允為人聰明辨智遇人氣和而色溫而好為策謀務一出已見不肯躡故迹頗喜言兵慨然有志於功名者也二子軾為殿中丞直史館轍為大名府推官其



年以明允之喪歸葬於蜀地既請歐陽公為其銘又請予為辭以哀之曰銘將納之於壙中而辭將刻之於冢上也余辭不得已乃為其文曰

嗟明允兮邦之良氣甚夷兮志則疆閔今古兮辨興亡  
驚一世兮擅文章御六馬兮馳無疆決大河兮嚙扶桑  
祭星斗兮射精光衆伏玩兮雕肺腸自京師兮洎幽荒  
矧二子兮與翱翔唱律呂兮和宮商羽戔戔兮勢方颺  
孰云命兮變不常奄忽逝兮汴之陽維自著兮暉煌煌

在後人兮慶彌長嗟明允兮庸何傷

吳太初哀詞

吳太初象先今為單州單父人父祐之從事廣州勤事  
死州瘴沴地象先以喪至州下亦死年三十一歲三試  
於禮部不中余與之善後七年其弟景初來視余於臨  
川慶厯六年也余思象先如初失之為之追考其為人  
為辭以哀之曰

越山如鱗兮達海而窮勢阻以偏兮毒潛其中子之自

重兮卒與之逢我知子初兮其父之從為其子孤兮吾  
未之恫孰神之苛兮又速子終嗟嗟乎然兮維戚吾衷  
維子之生兮順祥於宮父母之歡兮兄弟以雍出與人  
遊兮有守有容其材甚良兮剖劂又工一日而棄兮卒偶  
蒿蓬云誰不死兮萬古一空吾辭傳子兮無有春冬子  
天且屈兮猶壽而隆

王君俞哀詞

京師多尊官要人能引重後輩公卿家子有賓客親黨

之助略識文書章句輒出與寒士較重輕繇此名稱多  
歸之而主陞絀者因得與大位君俞在京兆門外不交  
人事讀書慕知聖人微言大法之歸趣孜孜忘晝夜寒  
暑之變其為辭章可道恥出較重輕漠然自如繇此名  
與位未充也慶厯元年予入太學始相識館余於家居  
數月相與講學會余歸遂別常愛君俞氣貌端然雖燕  
休未嘗慢在衆中恂恂或不知其朝士也至相與言天  
下士白黑無所隱其方且勇亦少及也太夫人素嚴君

俞怡怡奉子職退事寡嫂無間言畜妻子不驕為家不問田宅平居無褻私流侈之好以某年某月疾遂不起始丞相冀文穆公無主祀拔君俞以託其後君俞亦盡誠奉之茲可以不墜矣今太夫人年高而天奪君俞之命是於君俞之心不為大恨歟夫為人如前之云而不享於貴且壽曾未少施其所學又負其所承之心是於衆人之情不能泯哀也况重以相知其悲塞可勝乎作辭以泄其哀且系曰君俞姓王氏諱寅亮官至殿中丞

年二十六云

維相其初兮擇嗣於宗君提而秀兮乃立於宮廟門有  
戟兮祭祀以時相不失託兮君無墜恭庭闈樂康兮妻  
子不驕又事寡嫂兮端其服容衆人剪剪兮趨慕要津  
我躬處方兮不夸以從詩書百家兮其博而敏我講其  
疑兮往趨於中雖裕於心兮不耀其華維友則信兮其  
位未充方期顯行兮羽儀於世孰尸變化兮亟昇之凶  
沕穆無端兮莫敢責辭維舊及知兮哀攪余曾老母無

撫兮少婦失依賴有息子兮可望其隆嗚呼哀哉兮予  
悲曷勝託辭於牘兮恨與天終

元豐類藁卷四十一